

APELACIONI SUD BRČKO DISTRIKTA
BOSNE I HERCEGOVINE
Broj: 97 o P 000886 11 Rev
Brčko, 13.05.2011. godine

Apelacioni sud Brčko Distrikta Bosne i Hercegovine, u vijeću sastavljenom od sudija, Kaurinović Damjana kao predsjednika vijeća, Kovačević Maide i Klaić Ilje kao članova vijeća, u pravnoj stvari tužitelja Š. Ž., protiv tuženog Brčko distrikta BiH zastupanog po Pravobranilaštvu Brčko distrikta BiH, radi predaje u posjed, odlučujući o žalbi tuženog izjavljenoj protiv rješenja Osnovnog suda Brčko distrikta BiH broj: P-387/01-I-4 od 18.03.2011. godine, na sjednici vijeća održanoj dana 13.05.2011. godine, donio je

R J E Š E N J E

Žalba tuženog Brčko distrikta BiH izjavljena protiv rješenja Osnovnog suda Brčko distrikta BiH broj: P-387/01-I-4 od 18.03.2011. godine ODBACUJE SE KAO NEDOZVOLJENA.

O b r a z l o Ź e n j e

Prvostepenim rješenjem u predmetnoj pravnoj stvari postupak po reviziji tuženog, izjavljenoj protiv presude Apelacionog suda Brčko distrikta BiH broj Gž-307/02 od 19.02.2003. godine prekinut je do pravosnažnog okončanja postupka po prijedlogu tuženog za ponavljanje pravosnažno okončanog postupka istom presudom.

Protiv navedenog rješenja tuženi je podnio žalbu zbog povrede odredaba postupka s prijedlogom da se žalba usvoji „na rješenje o odbacivanju revizije Osnovnog suda Brčko distrikta broj: P-387/01-4 od 18.03.2011. godine, poništi isto i razmotri revizija tuženog“.

Žalba je nedozvoljena.

Prema stanju spisa predmetne pravne stvari tuženi je protiv iste presude Apelacionog suda Brčko distrikta BiH broj: Gž-307/02 od 19.02.2003. godine izjavio reviziju, kao i prijedlog za ponavljanje postupka. Spis (predmet) je dana 17.01.2006. godine vraćen Osnovnom sudu Brčko distrikta BiH na predhodno postupanje po prijedlogu za ponavljanje postupka (član 331-333 ZPP-a) uz dopis, budući da je (prijedlog) podnesen Osnovnom sudu prije dostavljanja spisa na odlučivanje po reviziji, cijeneći da odluka o prijedlogu može otkloniti potrebu da se odlučuje meritorno i o reviziji (član 335. stav 4. ZPP-a „Službeni glasnik Brčko distrikta BiH broj: 5/00, 1/01, 6/02, 11/05 i 20/06 – u daljem tekstu ZPP).

Pravosnažnim rješenjem Osnovnog suda Brčko distrikta BiH od 03.11.2010. godine, postupak za ponavljanje pravosnažno okončanog postupka je prekinut zbog smrti tužitelja Š. Ž..

Pobijanim rješenjem i formalno je prekinut postupak po reviziji, mada je o tome već odlučeno na način što je spis vraćen prvostepenom sudu na postupanje po prijedlogu (17.01.2006 godine), budući da je Osnovni sud nadležan da donosi rješenja o prekidu postupka, ovdje po reviziji na osnovu odredbi član 337. stav 1. i 2. ZPP-a.

Prema odredbi člana 305. ZPP-a protiv rješenja Osnovnog suda dopuštena je žalba, ako u tom zakonu nije određeno da žalba nije dozvoljena.

Saglasno odredbi člana 337 stav 1. u vezi sa članom 335. ZPP-a rješenje o prekidu postupka, ako prijedlog za ponavljanje postupka stigne Osnovnom sudu prije nego što je predmet u povodu revizije upućen Apelacionom sudu donosi sudija Osnovnog suda.

Odredbom člana 337. stav 3. ZPP-a propisano je da protiv rješenja iz stava 1. i 2. ovog člana nije dopuštena žalba.

Sljedom navedenog kada zakonskim odredbama, koje su imperativne prirode nije predviđeno da je dozvoljena žalba protiv rješenja kojim je prekinut postupak po jednom od izjavljenih vanrednih pravnih lijekova (do meritornog odlučivanja po izjavljenom drugom vanrednom pravnom lijeku), ni sud to pravo ne može dati u pouci po pravnom lijeku, to je u tom smislu žalba tuženog nedozvoljena i kad je to pravo dato u pouci o pravnom lijeku.

Stoga je odlučeno na osnovu odredbe člana 307. stav 1. tačka 1. u vezi sa članom 307. stav 3. ZPP-a kao u izreci ove odluke.

Na osnovu odredbe člana 39. stav 2. Statuta Brčko distrikta BiH («Službeni glasnik Brčko distrikta BiH», broj 17/08) i prelazne i završne odredbe člana 434. Zakona o parničnom postupku («Službeni glasnik Brčko distrikta BiH», broj 8/09), o žalbi je odlučeno po pravilima parničnog postupka koja su važila do stupanja na snagu vežećeg ZPP-a.

PREDSJEDNIK VIJEĆA

Kaurinović Damjan